

# 'Anggota Exco tidak diberi kuasa eksekutif'

KUALA LUMPUR 24  
Julai — Anggota-  
anggota Exco dalam  
kerajaan-kerajaan negeri  
tidak diberi sebarang  
kuasa eksekutif di bawah  
apa yang dipanggil  
sistem pentadbiran ala  
kabinet.

Mereka juga tidak  
dibayar gaji tetap  
melainkan elaun wakil  
rakyat serta elaun Exco  
dan elaun bila  
menghadiri mesyuarat.

Timbalan Perdana  
Menteri, Datuk Sri Dr.  
Mahathir Mohamad  
berkata demikian ketika  
diminta mengulas de-  
ngan lebih tepat apa  
yang dimaksudkannya  
sebagai pentadbiran ala  
kabinet itu.

Beliau menjelaskan,  
Kerajaan Pusat tidak  
pernah mengeluarkan

arahan supaya kerajaan-  
kerajaan negeri mem-  
bentuk pentadbiran  
serupa itu, sepertimana  
dilaporkan oleh dua  
buah akhbar tempatan  
(bukan Utusan) baru-  
baru ini dalam berita  
'exclusive' mereka.

Datuk Sri Dr.  
Mahathir berkata, apa  
yang dikehendaki ialah  
supaya kerajaan-keraja-  
an negeri menyusun bi-  
dang tugas masing-  
masing secara rapi dan  
teratur dalam bentuk ja-  
watankuasa.

Beliau menambah,  
tujuan sistem ini adalah  
untuk memastikan  
pembahagian kerja yang  
sama rata di kalangan  
anggota-anggota Exco  
dengan maksud melibat-  
kan mereka dengan lebih  
aktif di dalam pen-  
tadbiran kerajaan  
negeri.

Dengan sistem  
pentadbiran ala kabinet  
ini jelasnya, anggota-  
anggota Exco diberi  
peluang yang lebih  
meluas untuk turut serta  
dalam kerajaan.

"Apa yang sebenarnya  
sedang berlaku dalam  
kerajaan-kerajaan negeri  
ialah pembahagian kerja

di kalangan para Exco  
bagi menjamin pen-  
tadbiran yang lebih  
tertib dan kemas," ujar  
beliau.

Menurut Datuk Sri  
Dr. Mahathir, dengan  
cara ini anggota-anggota  
Exco akan memikul  
tanggungjawab yang  
lebih berat kerana perlu  
menjadi bidang tugas  
masing-masing.

Beliau menjelaskan, di  
bawah sistem ini,  
anggota-anggota Exco  
tidak boleh diberikan  
kuasa eksekutif kerana  
perlembagaan tidak  
membenarkannya.

"Jika mereka diberi  
kuasa eksekutif, mereka  
harus dibayar gaji tetap  
serta diberi kemudahan-  
kemudahan lain, tetapi  
ini bukanlah tujuan  
kerajaan," tegasnya.

Beliau menambah,  
sistem pentadbiran  
serupa ini bukanlah satu  
perkara baru kerana ia  
sudah pernah diamalkan  
dalam beberapa  
kerajaan negeri di masa  
lampau.